

新刊權載之文集

權載之文集卷第二十六

唐權德輿字載之

墓誌銘

王妣夫人宏農楊氏祔葬墓誌銘

王妣夫人姓楊氏宏農人祖敏皇太僕少卿交州都督  
金鄉縣公父晏湖州武康縣令夫人始笄歸于王考府  
君名重而祿薄家肥而身約仕至左輔尉中兵紀綱掾  
所與游者皆天下備人賢士夫人無攸遂勸以義之道  
備焉天寶四年先太保貞孝公既孤夫人慈仁訓育以  
文行紹續繇進士第授臨清尉葡縣尉安祿山之亂也

以大節聞履險違難崎嶇色養滅迹人事以扁舟爲家  
至德二年夫人棄孝養于杭州富陽縣之行次時四方  
兵交歲大疫江東尤劇未克歸耐此焉寧神先公號咷  
崩毀因中風濕痺痼外除拜御史右史著作郎皆以疾  
不祇命大厯丁未德輿丁茶蓼貞元戊辰再集艱棘餘  
生未泯積慶所鍾因緣踐履叨冒崇大以歲時之不易  
事物之多故久未遷神心焉若推言陰陽者利在卯酉  
元和五年歲直庚寅德輿忝太常卿以明年之吉襄事  
既具其年猥叅宰政禮不克就乃建宗廟以嚴蒸嘗述  
今十二歲在丁酉德輿以檢校吏部尚書理戎漢中拜

章上請協用龜策啟先太君壽堂于丹徒啟夫人壽官  
於富陽七月壬寅耐王考府君兆域于東都伊闕縣  
水之陽吉自杭抵洛凡二千五百里水陸安靜誠信無  
違天之佑也惟尊靈幽閔周一甲子罪在孱菲宜當誅  
殛而懿範遺訓流光孕休闔門受祉施于子孫霜露怵  
惕如惓如醒又德輿之生也後不獲逮事逃聽令聞靡  
詳萬一故合姓之紀歲棄代之享年皆闕焉刻茲介石  
以永終古銘曰

惟王母之令德淑明柔克闔門延耀以引以翼王父安  
卑兮其道未光先公大節兮易名章章伊孤孫之蒙駭

不獲逮事慶靈流澤兮積累名器溯河湯湯轉車帷裳  
伊水之陽附于幽堂萬有千歲兮德音不忘

先公先太君靈表

先公以大厯二年歲在丁未夏四月十四日棄代于潤  
州先友趙郡李公退叔已爲之墓表先太君以貞元四  
年歲在戊辰夏六月二十三日棄代于洪州亡友安定  
梁肅寬中又爲之墓表乃今元和十二年歲在丁酉秋  
七月十五日壬寅孤子山南西道節度觀察使銀青光  
祿大夫檢校吏部尚書兼興元尹御史大夫扶風郡開  
國公德與始獲備誠信以追命徽數昭告啟二封于丹

徒耐神于東都萬安山之北原其終始大要官闕大本  
並已具李氏之說孤窮噉號以補其缺文先公以永貞  
元年再追命爲工部尚書元和二年三追命爲太子少  
傅七年四追命爲太子太保太常考行易名曰貞孝公  
先夫人元和元年追命爲燉煌縣太君二年再追命爲  
絳郡太君先公有事君事親之火節道積于身而不得  
大行於時時不得蒙公之化士大夫之論炳如日星曄  
若鳳麟夫人輔佐中饋爲人倫師式上事姑下訓子爲  
順婦爲慈母孝愛寬順得內姻外姻之和如惠風甘雨  
長育生物永惟二尊并包健順用晦其明不丁於時受

名器褒錫于冥冥之下覆露蒙昏叨冒顯榮踰量脂毒  
日俟顛隕嗚呼曾王父以上塋於本州今限異域王父  
塋于伊水之陽屬者下附于伊水之陽不吉得萬安山  
之原吉以歲之不易與時之多故久未遷神懼至沒身  
常泣謂稚子璩曰苟吾未喪事死而不可以歸骨於九  
原不可以請諡於有司今則天幸克申私志異時從先  
公於斯丘也是得養于下也尊行淑聲備于前銘繼此  
譔刻哀荒罔極

獨孤氏亡女墓誌銘

井序

元和十年歲在乙未冬十月二十一日戊午故秘書少

監贈絳州刺史獨孤郁妻天水權氏寢疾終於京師光  
福里嗚呼吾之女也故哭而識之惟吾門代有懿德至  
先君太保貞孝公以大節大行爲人倫師表故鍾慶於  
爾而又天闕其成此吾所以不知夫天之所賦也初笄  
有行未嘗違父母兄弟考室同里常如歸寧始絳州以  
褐衣納采其後爲侍臣史官更掌中外詔詔皆再命或  
三命十數年間便蕃清近烜赫光大天下公議以宰政  
待之其於閨門之內供君子供先祀嘻嘻申申有孝有  
仁乃者吾忝大任絳州居近侍而能婉約勞謙得六姻  
之和長信宮受冊命之歲與母於內朝序位環佩之聲



相聞黨族榮之人情禮意纖微矩度言內則者以爲折  
中噉夫絳州方強仕不淑爾又未練而沒年止三十一  
天之報施其何哉始稱未亡人也懼貽吾憂每斂感容  
而爲柔色然以沈哀攻中竟不能支悲夫初先舅憲公  
有重名於時絳州生而孤不得逮事儻冥冥有知將同  
穴而養於下耶抑習氣在上歸於冥寞耶吾不知也生  
男子二人女子一人長男前一歲未成童而天次日晦  
生十年矣至性過人未期月再丁荼蓼數號罔極晦世  
父右拾遺朗茹終鮮之痛撫之如不孤貞於龜策得明  
年六月六日壬寅祔塋於東都壽安縣之某原宜琢墓

石以承于後吾老矣豈以文爲懼他人不知吾女之茂  
實故隱痛而銘曰

暘光未晝而湛晡兮植物方華以槁落兮懿吾女之淑  
令兮耐君子於冥冥已乎已乎吾不知夫神理之有無

殤孫進馬墓誌

權氏殤子名順孫小字文昌以被病用桑門法更其字  
曰君吒贈太子太保貞孝公之曾孫今刑部尚書扶風  
郡公德與之孫渭南縣尉璩之子始仕爲僕寺進馬三  
十三年以元和十年十一月二十二日天子光福里二  
十七日斂手足形于萬年縣神和原旣闔棺其大父泣

而誌之曰尔幼有敏志孝順敬遜承大父母父母之教無違旨雖孝子順孫成人者之養不若也故吾以名之讀孝經論語尚書尤好筆札不離硯席凡舉措語言循理論義出常童遠甚方肄小戴禮業未竟而感疾自春涉冬綿四時瘳劇大病之際上辭尊長下訣幼弟妹恬然不亂且謂其傅婢曰空中佛事儼然在目促焚香穰吾枕西嚮合掌而絕始吾常疑神滅不滅之論逮今信矣噫嘻以尔已仕且有成人之志吾欲勿殤知禮者曰不可而不敢逾也惟大墓在洛師得陪附之吉於後歲故於是權窆而號曰

惟魂氣兮無所之尔之神得所往兮吾又惡用夫涕洟

叔父故朝散郎華州司士叅軍府君墓誌銘

并

序

序曰洪範叙三德五福之道而德在乎人福繫乎運時  
未光大則卷而懷之姑以清行厚德遺諸子姓而已公  
諱隼字子鷺天水略陽人十二代祖安丘敬公諱翼爲  
前秦司徒代有勲德以至四代祖平涼公諱文誕歷開  
府儀同三司洪常二州刺史曾祖滑州匡城縣令諱崇  
本王父益州成都縣尉諱無待烈考許州臨潁縣令諱  
俊初平涼之先三葉開國匡城以降世名文行公纘成

茂緒祇服家法有大易之鳴謙中庸之慎獨慥慥其守  
孳孳其勒中立而不易方夷道而不由徑故克家無玷  
千祿有聲天寶末州里舉經明屬幽陵叛換計偕中止  
解巾試守河西尉真拜鄆陵丞時東郊不開違難逃祿  
艱貞潔白終出盜泉朝廷嘉之除楚州寶應丞是歲太  
夫人弃孝養刺血寫大乘微言毀瘠過禮旣除喪爲親  
戚所勉調補宋州宋城縣丞孟尚書某方持郡節深相  
推重每歲考課居郡中最大厯中授福昌丞貞元初改  
華州司士嘗辟彭城劉公蕭國班公之府皆分事任實  
助經費所至之邦必聞其政所奉之主必以加禮而又

學古不忘歌詩必類緣情而不流體要而無害故秘書  
包公謂公內外循理心正氣和君子以爲知言其道未  
伸天奪之筭嗚呼貞元九年四月辛亥終于富平從事  
之館享年六十一夫人陳郡殷氏皇曹州司法麗正殿  
學士踐猷之孫河清尉寅之女故給事中杭州刺史亮  
其兄也今侍御史郴州刺史永其弟也生德義之門襲  
猗那之慶自執筭主饋逮四十年孝慈柔明六姻是仰  
學備箴誦言成禮法公之祿甚薄而家甚肥中外無間  
言諸孤猶已子闔門之內和樂薰如也旣茹未亡之痛  
護奉輜車東旋洛都八月癸丑遘疾癘終于新安之別

聖享年若于有男五人長曰少成仕至桐廬尉次曰少清以經術甲科次曰某曰某皆以文學裕靈稟公之義方女子五人長適安福尉劉公範次適常州司倉齊暢其次未及笄皆稟夫人之明訓少成等曾未半歲再集茶蓼思養于下如不欲生銜恤忍哀竭其誠信以十月某日得吉卜於新安縣山南龍澗原禮也小子亂處而孤夙承善誘且懼徽音行實之不傳于後與陵谷之有遷也謹用論譏哀而不文銘曰

惟叔父秉直清溫而文誠而明六試吏揚令名再從事有淑聲猗夫人懿純德倬婦行爲內則樂申申恭翼翼

女有家男述職天不備降鞠凶道未行禍已鍾刻金石  
識邱封德不泯哀無窮

再從叔故試大理評事兼徐州蘄縣令府君墓

誌銘

并序

府君諱有方字某天水略陽人也曾祖崇本皇朝散大  
夫滑州匡城縣令祖若納皇右補闕起居郎桂歛梓三  
州刺史考做杭州紫溪縣令代以儒門四科爲家法故  
發于文則菁華施于政則惠餘公承是休德餘躬踐行  
得詩之無邪易之通理凡五授命皆以推擇曰左清道  
率府兵曹叅軍太子通事舍人陳州司法叅軍亳州司



士叅軍以至大理評事兼徐州蘄縣令滿歲南游遭疾  
于途以貞元十六年夏五月歿于楚州之旅館春秋若  
于夫人河間劉氏樂城公仁軌之元孫也明智才淑有  
子曰長儒弱冠舉進士甲科文行清直泉其容水漿不  
入以某年某月日得吉卜于某地其引也蓋殯也以輿  
師繁興未遑歸窆于東周之大埏姑刻圓石書其畧云  
公夷通直信睦姻任恤位卑而志宏居約而家肥有爲  
有守不疚不跲其初命再命官衛贊謁雖未居真秩而  
四方之嘉招狎至其後掾二邦奉六條受祿不誣實聞  
其政或攝領通邑分乘輅車皆有裕人之仁急病之義

及理於斯也能遂物之宜不奪人之時嘉惠善利洽於  
千室猶卽墨桐鄉之理無不及也又嘗饋師于回中從  
事於夷門皆有功利稱于其府其去蘄也西方節將讓  
委以謀猷介饋之重且謂弓旌之未稱也將以柱後惠  
文之冠招公章旣上而公大病斯可歎已猶子族子自  
若及總侍疾承訃崩波塗潦又以見公風訓慈仁之所  
逮也噫嘻自匡城至公四代而三爲縣大夫皆用循政  
聞且以兩漢邴曼容陳仲弓爲準故不至豐祿加以梓  
州之懿文盛德排抑於時道未光大終于郡節或者善  
祉必復其在裔乎此宗門所以有望於公之孤之昌大

也既而緘公理命命以論諛小子愀然涕洟而爲之銘

曰

恭惟叔父信厚清厲有車翹翹將事匪懈掾吏二部文  
而無害施化一同斯人以父易象視履謂耆而艾奄然  
不淑力命相戾楚挽虞殞風煙晦昧屬詞貞珉寧此厚  
載

再從叔故京兆府咸陽縣丞府君墓誌銘

并序

府君諱達字某天水畧陽人曾祖崇本皇朝散大夫滑  
州匡城縣令祖若納皇通議大夫桂歛梓三州刺史考  
僖皇深州安平縣令自十二代祖前秦安邱敬公至四

代祖平涼公皆有勲力爲通侯大吏自匡城至安平以  
文采政事爲列城二千石家法休聲貽于後昆府君以  
士行吏理平端簡實大厯初調爲家令寺主簿厯同州  
馮翊縣尉河南府登封主簿京兆府咸陽縣丞居之必  
聞考績得之必由綜覈中外之姻或據戚里都俊鄉未  
嘗巧從以去窮約且以枉道由徑食浮於人爲戒大率  
每十歲徙一官故厯三紀而四受祿勤官肅事不誘于  
長上循理蹈和不攝於健羨其有常歟其難進歟貞元  
十九年歲在癸未秋七月壬戌感風疾終於新昌里享  
年六十九先是夫人南陽張氏明茂有禮法亦天奪其

壽府君周縵既除三月而鞠凶及悲夫支子墳等謀於族屬家老以明年春三月己酉耐真宅於萬年縣龍首原謹書官次以納幽窆銘曰

幽丘而下躡躡圭組宜昌鄜城乃代啟土平涼策勲梓州懿文家謀德風儀刑薦紳時惟叔父祇服丕矩始仕官卿乃從左輔周旋二畿坦坦安卑遵道而行不競于時脩短奄忽兮嗚呼涕洟崇崗美楨分永識于茲

唐故河南府登封縣令權君墓誌銘

噫嘻吾之從祖弟曰少成字某仕至河南府登封令而歿其年五十七曾祖王父益州成都縣尉府君諱無待

王父許州臨潁縣令府君諱伋父華州司士叅軍府君  
隼三業有文行而賦祿不稱當時才士各人皆與之游  
君甫成童通左史古文小戴禮以經明調選爲睦州桐  
廬尉凡七徙官皆以功次得調其爲右威衛紀綱掾尚  
書郎有官人於黠巫者請爲之介裔夷得職其爲河西  
尉奉職于左曹吏無竒袤其爲梁縣令也二千石領行  
詔條繆行徵令而多賦于人屬城皆不能辨君毅然有  
守折其疑文詞堅氣正不直不已梁人得以蒙其澤遂  
其生郡表尤異拜河南府兵曹曹事修理元和十一年  
調補登封春二月病風痺遽秋寢劇九月十七日啟手

足於官次悲夫君仁厚質實廉隅介獨潔清在公顯沛  
以之探經術法義往往以文自道不務游談不馳名聲  
深知者以爲古之循吏不若也階近赤紱官近朱轡謂  
跋而及竟歿於周圻一同之地斯可慟也娶博陵崔氏  
某官某之女雅有婦行長男頊以經明爲鳳州兩當令  
專敏好學次曰瑄華州叅軍薦志於文章幼嗣曰某曰  
某皆在雅儒呱呱以泣頊等以明年二月安附于伊闕  
之舊封禮也嗚呼吾無葦叔父無葦大功兄弟以至於  
君且有一歲之長班白相視疾恙相悲奄然委化痛入  
肝膈故出涕而銘之銘曰

東周蒼茫兮旬邑鮮原以之賦政兮以之歸根嗚呼不  
可作兮死生法云

唐故使持節郴州諸軍事權知郴州刺史賜緋

魚袋李君墓誌銘

并序

君諱伯康字士豐隴西成紀人自梁武昭王元孫文穆  
公冲爲元魏僕射司空與兄穆侯恭侯惠侯莊公中秉  
樞揆外顧方國文穆公二子長曰延宴次曰休纂論道  
追命皆至司徒蟬聯茂盛冠於百族君卽叔氏司徒之  
後也曾祖仲進皇宣州司馬祖僑皇河南府滎河池縣  
令父愔皇朝議大夫宗正丞贈濮州刺史三葉用晦士



不過郡佐縣大夫典司宗籍而天爵崇茂士林嚮仰君  
以才實克家清方入官始爲知己者所薦授閬州司倉  
掾轉下邳福昌奉先三縣尉皆有能名建中三年調補  
御史臺主簿成奏未下以太夫人寢疾歸侍藥膳明年  
丁內艱衣裳外除迨嚴君之命復調爲長安尉時王師  
清宮鑿輅初復武人干吏理轂下爲多事邑之細大必  
決於君每歲考績爲府中最貞元五年再集茶蓼終喪  
猶毀不交人事屏居池陽以耕植自業九年春西鄙不  
靖詔城五原以備邊鄜延節將選重寘佐以厚禮辟君  
實董塞門之役不愆于素抑有勞焉拜監察御史轉殿

中錫以章紱尋遷侍御史加檢校工部員外郎凡十年  
四徙官爲鄜上介伐謀而鄜之師以律折獄而鄜之人  
不寃十八年從守臣來朝行次中部所從復于左轂護  
其轉祿以至京師庀具會事稱情中禮十九年秋七月  
拜郴州刺史精力惠養蠲除煩苦導利省嗇而人不擾  
廉平信厚而吏知方今相國左丞鄭君頃移佐茲郡知  
君也熟洎入總綱轄盛推理行再筦宰政方圖陟明斯  
言未復奄忽凋落時承貞元年十月某甲子春秋六十  
三悲夫君天資器幹機用強敏夷易疏通不趨各聲學  
尚周洽而情情甚麗業履端脩而睦姻允篤時人多知

君吏理過於文行唯故相太傅盧恭公今相國左丞鄭君臬鄙人實知之而棲遲下國迫阨委化斯可嘆已夫人范陽盧氏宣城縣令炅之女華緒令儀執笄佐餽先於君歿二十年矣嗣子盧氏縣尉操次子前明經掖支子某等皆以孝經而承訓儀君令弟爲長安主簿少安請急襄事崩波勤遠自荆抵洛泣奉轎車以元和元年某月甲子塋于某縣某原之舊封君子曰於長安之見之喪有以見同氣之痛德輿以中外伯仲周知所履刻石紀事朴而不誣銘曰

邠之政兮理平君之行兮廉清矧有深知兮秉國之成

丞言于朝兮將陟其明  
窘然符守兮奄忽冥冥  
負自應約結兮未據  
生平道途自遠兮廣柳  
芻蕘風雨所交兮卜  
洛佳城元龜是貞厚載  
是寧子嗟乎內兄

唐故長安主簿李君墓誌銘

并序

君諱少安字公和隴西成紀人自元魏僕射文穆公冲  
而下爲西州冠族或位不充者必以令德聞曾祖仲進  
皇宣州司馬祖僑河南府澠池縣令父愔朝議大夫宗  
正丞贈濮州刺史君卽濮州第三子敏信寬綽篤于行  
義方舉孝廉偶爲所親者薦延授興州阜城縣尉旣非  
所好終不屑就王黔中礎之持節廉問也表爲推官轉

支使歷左武衛曹參軍大理評事用誠直贊佐夷落  
之人宜之府除至京師轉三原縣尉筦中書甲庫考績  
四居上第遷長安主簿二陵復土之重比歲會同軌轂  
下所莅儲峙無違典司廡置肅給安靜尹守以爲能方  
授代而復表留一歲御史府司察視者數薦君自代君  
方勇於退故朝命未及焉元和三年三月己酉感疾不  
起於長安興化里第享年五十君溫仁孝友喻義循理  
恢恢然有君子之度齒位皆屈而智者歎焉夫人樂陽  
鄭氏太僕少卿叔規之女仁而不壽先是君元兄郴州  
刺史捐館舍請急襄事問關勤遠問一歲有嗒然之痛

喪服甫除俄啟手足噫以積善之家而叢不淑如是糾  
纏之數其可問耶嗣子栻授等號奉轎車以夏五月景  
申祔于東都潁陽縣之某原禮也音撤未沒志義相倫  
情殷中外年同甲子滯涕操管銘于墓門銘曰  
族之盛兮才之令兮纔知命兮俄大病兮塋者藏兮頌  
之陽兮誌丘荒兮杳茫茫兮

唐故洪州建昌縣崔君墓誌銘

并序

君諱遴字某博陵安平人也六代祖北齊右僕射昂以  
文學止直周歷諸曹禮樂刑政所損益者十七八生隋  
水部司門二郎中洽有風儀器尚以世其家司門生皇

掖縣令曇首掖縣生武邑令紹武邑生白水尉頊頊生汾西令贈定州刺史昇之自掖縣四世含德不耀君卽定州府君之長子故相國右庶子安平公其介弟也恬淡愿慤不遷於時仁于鄉黨友于兄弟大厯中御史大夫贊皇李公之宣風于吳也聞其賢起家表爲常州武進縣尉跡徇知己心不近命俛視官曹非其好也建中初嗣曹王分閩按部于九江之西又以名聞轉洪州建昌縣丞君喟然曰莊生於陵子吾之師也惡用是哉終不屑就先是築室於毗陵疏清流蔭碧鮮樹藝偃仰有終焉之志貞元十年正月日寢疾終於其家享年六十

三夫人范陽盧氏華宗淑行動循禮法其孤景伯等年未及冠皆專經趣善藐然銜恤護奉轎車以明年十月某日歸附子河南東原之舊封先遠故緩也季弟著作郎述貞諒遜悌稱於士林抱終鮮之痛主歸全之禮以德輿詳其所履俾爲墓誌銘曰

公綽之道澹無欲兮潔身用晦言可復兮視履考詳宜戩穀兮乃如之人胡不淑兮周原舊封森拱木兮予以寧神識陵谷兮

唐故給事郎使持節房州諸軍事守房州刺史

賜緋魚袋崔公墓誌銘

并序



公諱述字元明博陵安平人自東漢長岑長濟北相代  
擅雕龍之美濟北五代至晉大司農洪司農八代至北  
齊右僕射昂僕射三代至公會祖皇朝散大夫冀州武  
邑縣令諱紹大父同州白水縣尉諱頊烈考晉州汾西  
縣令贈定州刺史諱昇之代有文行懿德爲北州冠族  
公夷雅溫粹安舒廉靜於座右銘得含光之妙於政論  
得理道之奧以之脩身以之理官蓋家法積厚而公能  
踐之之故也始自官衛試守未弱冠而爲藍田尉已有  
嘉問尋轉發州浦陽令揚州兵曹叅軍皆以吏理著稱  
故辟書交委命書隨之歷監察御史殿中侍御史再爲

侍御史實佐壽潭洪三邦車賦之重拊循輯睦繫上介  
是賴府遷子荆薦言子朝拜著作郎虞部員外郎論著  
奏議率循憲矩不毀方以求合不出徑以趣捷貞元十  
二年出爲房州刺史承長帥剛嚴之理當輿師饋饗之  
殷暴征繼起煩言狎至而能推情厲身以裕勞人惻隱  
所被四封嘉靖十七年秋七月辛酉感疾捐館舍春秋  
五十七夫人京兆韋氏奉公官之訓爲女士之表凡合  
姓二紀柔而正勸以義之道備焉其孤文伯武伯等學  
通禮籍姿性純至斬焉相視泣奉裳帷以冬十一月甲  
子祔塋于東都某原禮也初公仲兄左庶子安平公有

重名于時安平所與游者公皆從而游焉故常與賢士  
大夫推古今世道博約論辨摠之於詞凡數千言因曰  
勝質之文吾所甚懼彼奔馳塞路者旣不可遏又惡用  
斐然之爲邪遂輒削去其用晦如此行義醇備慈仁任  
恤安平旣卽世伯兄繼沒猶子之解巾結纈先於已子  
故不舉火之日男未仕女未行其於疾則十起衣無常  
主雖伯魚稚春不能加焉群從族姻均祿直以賙其乏  
不結黨友不趨聲利常欲脩性息跡考一邱之樂而未  
齒與位皆負其實奄然不淑爲知者所歎建中初德輿  
遇公于九江之西其後辱安平戴侯之知於公護南容

之眷刻石誌美不敢易辭而實錄焉銘曰

齊稱大風漢有文宗雋賢嚴毅似續昭融坦坦房陵勞  
謙孝恭優游祿仕惟道之從素履不華黃裳在中乃儀  
列屋乃飾伏熊居易處厚有初有終魂氣杳冥諸孤哀  
慟圓蒼大蔡先遠攸同刻茲貞珉永黃邱封

權載之文集卷第二十六

權載之文集卷第二十七

唐權德輿字載之

墓誌

唐故相國右庶子崔公夫人河東縣君柳氏祔

葬墓誌銘

并序

貞元十有一年歲在乙亥春三月丁丑故相國安平公夫人河東縣君考終命于京師安仁里蓋春秋若干其孤曰懿伯號侍轉祿以十月庚午返耐于河南某原安公之舊封禮也夫人姓柳氏代爲河汾右族齊周之際中書孝公虬司會景公慶以匪躬厚行爲北朝名臣孝

公生止戈後周洛州刺史洛州孫皇海州長史憬生皇  
伊陽縣丞璿夫人之祖禰也夫人憑積厚之祉體柔嘉  
之姿旣笄歸于安平公公始以處士納采至于佩相印  
三十年間內則彰閭嘗以命婦宜家疏封于本郡又以  
中宮恤禮爲位於內朝齊明以助祭慈惠以厚下禴翟  
五采副笄六珈幽閒必聞於法度侈汰不萌于心術盛  
德發于身而被于族姻不可詳已始用和樂安于隱約  
終以居均居於顯尊大君子之家肥道光其助宏矣旣  
以未亡之痛深惟出世之法受微言于順禪師以蓮花  
枝葉爲方寸津筏宜其永錫眉壽而爲大家今則已矣

未嘗不知夫命也懿伯爲左干牛備身純孝好學居喪也其長女適宏農楊宏微纔半歲有共姜栢舟之誓明晰敦行倫于古人幼女以衿禱來歸共承宗事故于夫人之道得周知之懿伯以陵谷之不可以不識哀請論撰大凡以乾元元年合姓貞元二年受封安平公薨八年而夫人捐歸其銘曰

於穆夫人徽柔淑溫儀于德門蹈履內則六姻是式藹然慈人魚軒煌煌佩玉鏘鏘威儀申申居貧且樂處貴愈約其道可尊不享大年奄歸下泉孰司陶鈞哀此孝嗣莞然無恃訊于蒼旻東周故園宰樹鮮原裳帷翻翻



耐于幽窀刻是貞石厥聲長存

唐故義武軍節度支度營田易定觀察處置等

使檢校司空同中書門下平章事贈太傅上

谷郡王張公鄧國夫人谷氏墓誌銘

并序

夫人姓谷氏魏郡昌樂人其先漢大司農承之後故義武軍節度檢校司空同中書門下平章事贈太傅上谷郡王張公之夫人也四代祖郝律貞觀中仕至諫議大夫宏文館學士曾祖補衮左羽林軍長史祖倚相秘書省正字佑爾銜以嚴禁旅詳魯魚以考秘文猶未充其才則延耀于後考崇義天寶末以雄畧氣敢從漁陽之

師每建奇功，亟推北狄，歷左武衛將軍、左金吾衛大將軍，累兼太僕殿中，追贈特進，懿是勲，慶叢于夫人，天資才明，動合圖史，早以矜讐之誠，宜于鐘鼎之門，百兩以納，采三月而助祭，克洽中饋，至于上公，其于佐以純誠，規以策畫，超冠命婦之道，叶贊守臣之勞者，有焉。建中元年，疏賦于魏郡，三年，徙封于鄧國，徽音法度，列在命書。貞元七年，太傅薨于理所，嗣子今義武軍節度使，定等州觀察處置等使、工部尚書、易州刺史兼御史大夫、延德郡王、茂昭能業，其勤載死，其賞克家，稟訓宣力，撫封六官分職，八命作牧，虞潭榮養，用厚人倫，魯侯燕喜。

方期壽考伯仲有裕稱于北河曳裾于邸第者三持憲於牙門者一貞元十一年以幼子銀青光祿大夫光祿少卿駙馬都尉茂宗旣承築館之恩來俟執筭之慶方榮著代俄痛終堂以十二年二月丁卯寢疾歿于萬年縣安仁里享年四十九遺表以車服器用上獻王人執第申吊賜絹三百疋布一百端此又恩禮之有加尚書以移孝在公遠竭誠信光祿以銜恤茹痛躬奉裳帷以其年冬十月甲戌得吉卜于京師少陵原不祔于太傅行古之道也生極井賦沒有寵賻恩備終始以榮以哀申命司言之臣探其淑行用琢琬琰銘于墓門銘曰

鵲巢之德夫人之職輔于上谷啟是鄧國淑慎溫惠徽  
柔令色克大閨門施于燕翼萬鍾雖及九原俄卽賦命  
有涯孝思罔極

唐故衛國夫人墓誌銘

并序

夫人姓李氏趙郡人前相國司空今戶部尚書燕國于  
公之室也曾祖仲思皇藍田縣尉祖琳河南叅軍考復  
司農丞三業名器卑而婚親族類爲山東冠甲外曾王  
父斐丞相文獻公左右元宗爲時才臣外王父吏部郎  
中贈刑部尚書綜以文行清名著於舅族多賢與軒冕  
俱大中外積厚而生夫人興元元年燕公以南官郎冕

而親迎其後歷二千石九卿觀風貞師輝燿宏大三公  
相印六職地征勤勞輔佐淑慎和樂鵲巢之均一樛木  
之逮下采蘋之能循法度孟斯之子孫衆多寔備有焉  
晉令公侯夫人銀印青綬佩水蒼玉貞元二年夫人以  
外命婦封河南縣君十九年以元侯內子進衛國夫人  
廣大專靜尚柔含德不言而徽音自遠不耀而儀型可  
象鍾郝之禮法爲而不有姬嬴之地望有而不恃于六  
姻之中薰然以仁煦然如春推心以及物各得其所欲  
故燕公琴瑟友之鐘鼓樂之克成婦順以贊家道元和  
十年冬十二月甲辰寢疾薨于安仁里第享年若干不

求醫禱以順性命雖知道之君子所難能焉明年春二月庚申嗣先姑之塋于興平縣之某原禮也嗣子前太子左贊善大夫正秘書丞方某官季友某官某等永惟免於水火以至冠婚列在朝序率由慈蔭自帷堂至於遣奠哀敬有加燕公以德輿於外族爲表甥于中臺爲同列嗒然之痛俾誌斯文公又命方等泣狀往行始終詳實故如其論次繫之以銘銘曰

燕公之室宏是內則衛國攸宜淑明柔克環佩鏘然蒸嘗吉蠲家肥族睦二十二年如賓之敬循道之性不慮不圖奄忽大病茂陵蒼蒼宰樹陰堂幽宅于茲兮德輝

不忘

前京兆府咸陽縣丞權公故夫人清河張氏墓

誌銘并序

夫人姓張氏南陽人曾祖鉉皇正議大夫常州刺史祖  
重輝皇朝議大夫衡州刺史贈太常卿考伯禽皇銀青  
光祿大夫將作少監兼通事舍人奕代以大夫二千石  
班宣教化而先公贊謁在帝左右兄憑又以衛尉少卿  
簡王傅世其官故表儀風訓家法延耀夫人承是吉祿  
生而懿美大歷十二年旣笄歸于天水權公公時爲馮  
翊縣尉其後簿登封贊咸陽徊翔於周秦間皆用功次

得調滿歲食貧則嘻嘻於衡尊之下族屬和而家事理  
抑夫人是賴資性溫重閨門整峻每中外六姻有嘉會  
喪禮必羞必赴周旋法度女士憲焉而不得鳴珈佩玉  
宏大中饋命也貞元十八年夏四月暴嬰疾寤終于東  
師新昌里春秋若干秋七月窆于其縣某原從吉筮也  
支子某等充窮拔泣捧是圓石云以不可不識命從祖  
兄子銘之其詞曰

在漢七貂族之盛兮常山衡陽休有慶兮父兄仍代贊  
名命兮展彼夫人來合姓兮徽柔靜專家道正兮生也有  
涯斯大病兮芻靈廣柳掩泉徑兮刻此貞珉彰淑令兮



唐故朝議大夫洋州刺史王君夫人博陵縣君

崔氏祔葬墓誌銘

并序

夫人姓崔氏博陵安平人皇鳳閣侍郎平章事博陵郡  
王元暉之曾孫禮部侍郎璩之孫侍御史賁之息女洋  
州刺史瑯琊王君澄之嘉耦崔氏自漢濟北長岑代爲  
文宗王氏自晉睢陵口邱繼生元臣二族之茂范蔚宗  
沈休文推本言之矣重以母后中宗之際石泉博陵二  
先正有經綸命代之材推戴格天之業延耀濟美爲祥  
爲祉爲君子爲士女合姓好逑與他族不作夫人未筭  
薦失恃怙旁無弟兄血泣襄事奉二尊裳帷間闕道途

自鍾陵抵洛邑哀敬與禮三者無違神佑純孝爲宗姻  
所歎某年從父兄縱盛選卿才故王君納采焉王君以  
才器政事連辟公府歷御史司直爲河南紀綱掾改陽  
翟令入爲尚書屯田郎出刺洋州柔嘉左右叶是休德  
初洋州同氣八人名位焯于當時冢婦介婦必華宗淑  
詰夫人贊宗事供先祀鼓瑟誦詩姿操嫻雅奉上以誠  
羣居用和外言內言不越于閫朝服祭服必成于手洋  
州捐館二十年而夫人歿於櫟陽之別墅時貞元十九  
年秋七月某甲子蓋年五十一初洋州娶滎陽鄭氏生  
子曰造而天夫人以繼室生子三人曰迺曰遠曰蕙母

儀均養皆爲良士造仕至藍田尉迺修詞與計僭遠邁  
咸以門資分佐環列哀號罔極泣問龜策以二十年冬  
十月某甲子耐子洋州之舊封先是洋州猶子興平尉  
源長受夫人之理命曰吾與爾二門積德奕代銘表必  
咨時文先舅之碑吏部郎趙郡李公實爲之先君之誌  
從翁太傅文貞公實爲之且以德輿于夫人有通世之  
舊猥求論譔泣狀遺懿實而不華是用采獲以銘內則

銘曰

安平臨沂右族蕃滋仁賢是儀好合嘻嘻乃封故地象  
服斯貴諒無攸遂亦勸以義婦順彰閭母儀可尊肅肅

開門四男晨昏于嗟風樹奄闕泉路魯人之耐皇辟之  
墓鏤茲淑聲永識冥冥

唐故湖州武康縣丞許君夫人京兆韋氏墓誌

銘并序

夫人韋氏京兆杜陵人楚傅漢相之後分封競爽以至  
周郎襄公孝寬爲宗門龜龍曾祖某某官祖某某官父  
楚器皇太子宮門郎其外族隴西李氏梁武昭王元盛  
後魏司空文穆公冲隋絳郡公禮成之世德輿之從母  
娣也中外華閭乃生淑詰幼失恃怙先太君保而養之  
猶女子子焉旣笄歸于某郡許授授循理喻義調常州

義興尉湖州武康丞滿歲葺田廬於霅溪之上忘懷進  
取夫人贊家道以供先祀誠伯宗而盛吳缺許君之動  
靜無悔抑有助焉所從之祿甚薄不及偕老徙宅教子  
宜家佐餽閨門之理有同嚴君才識所及過人遠甚雖  
內外之言不越于閫而人事物理皆能折中焉凡結禱  
二十五歲而稱未亡人又十五歲而不舉火時元和二  
年正月某甲子春秋五十九其子士儉謹敏屬詩書未  
與計偕者不忍違養故也泣訪耆蔡得十月某甲子吉  
權耐于皇辟之封惟夫人有姿操徽範不得被魚軒翟  
茀之飾獨振內則而傳母儀孝于冢婦居喪率禮禮無

遠而哀有餘姻黨稱焉嗚呼孩提相長實均同氣今視  
士儉猶吾之出焉士儉緘哀詞理命請刻圓石屑涕直  
書寄茲沉痛銘曰

士之贊行未必豐祿有美夫人不登象服從夫也有德  
有儀訓子也恩斯勤斯勸以義兮導之慈養未及兮命  
奪之服在總兮心若葦刻琬珽兮流涕洟

唐故潤州昭代寺比丘尼元應墓誌銘

并序

維貞元六年冬十一月戊子比丘尼元應化滅于潤州  
丹陽縣昭代寺享年五十四經夏十有三明日庚申寧  
神子縣北之某原刻石紀墓虞陵谷之變也叙其畧則

本朝公宮之教早繼德門之室次有徙宅之訓終悟捨  
後之宗紀其詳則俗姓盧氏世閩華峻倬於漢魏以至  
北齊黃門侍郎思道卽六代祖也曾祖悌隱居不仕祖  
暄皇中散大夫邠王友贈秘書監父滢皇中散大夫婺  
州刺史惟先人叔父迭領各藩出也作民父母入也爲  
王卿士再世出于裴而舅族多賢繼貳六官聯居九牧  
中外纓冕之盛冠于士林儲是德慶宜有淑詰初以旣  
笄之年歸隴西李君晉卿仕至東陽決曹掾靖恭敏直  
齒位皆屈其子輔贊淑賢之道盤裝組紉之事舉無違  
德姻黨宜之晝哭之後樓心釋氏旣厭有生之患竟從

受具之法灑濯世網揭厲元津外修尸羅中習禪惠法  
器方茂遽與化俱初決曹府君前夫人范陽盧氏子曰  
暢幼懷字育之仁夙奉詩書之訓再以經術踐甲科歷  
校書郎密縣尉柴毀樂樂隣于滅性孝慈相感各教多  
之銜恤卜兆竭其誠信附于窀穸之事率從苾芻之儀  
且遺令也德輿于密縣爲族外弟服儒同術里仁甚久  
哀託論譔謹無媿辭銘曰

柔濡清淨蓮花之性端明綱直淑女之行上無詒離下  
振母儀晚悟冥諦空王爲師體魄者何電燄無期往而  
不復哀哀孝思



唐故洛陽縣尉何君夫人范陽盧氏墓誌銘

序

夫人姓盧氏范陽人曾祖仁皇相州錄事叅軍祖不勤  
皇壽州霍山縣丞父隨皇太原府祁縣丞三世冲晦皆  
不至大官故夫人鍾其粹美生爲嬪則以旣笄之年歸  
盧江何君官至洛陽縣尉夫人有輔贊之美柔明之行  
誠順孝慈以內則爲師故得六如之和而禮無違者乾  
元中何君早世夫人訓字諸孤動必以方長子士程爲  
蘇州嘉興尉幼子士乂儒行脩明或吏或文克荷先構  
有女二人長適河東裴氏次適博陵崔氏皆奉母氏之

訓宜其家室非導之教之之至其及此歟以興元元年  
三月日考終命于嘉興年六十一士程士父等謀及龜  
筮以某月日權厝潤州未克返葬故也夫人卽考功員  
外郎士幹之世母也子嘗接考功遊獲聞行寔故不敢  
辭二孤之請刻石以銘之辭曰

婉彼夫人淑明柔克周旋動用率由四德不享繁祉不  
躋壽域二連之哀哀何有極

唐故潤州丹陽縣尉李公夫人范陽盧氏墓誌

銘  
并序

夫人姓盧氏范陽人北齊黃門侍郎思道之五代孫也

曾祖悌皇高道不仕祖綱皇城門郎父侑皇太原縣尉  
雖仕皆數命以至淪謝而皆飾行懿文有當時之譽明  
德奕世誕生夫人既笄嬪于李公公爲烏程丹陽二縣  
尉夫人居貧守約動必由禮謙敬以睦中外吉蠲以奉  
蒸嘗甘糲梁服澣濯中饋式叙和樂嚶嚶有嘉聞而無  
攸遂一紀于茲矣嘗聞善餘慶謙受益豈前志之謬歟  
將有必定之數歟既而奄忽遘疾不翌日而大漸以大  
歷十一年月日沒于丹陽之私第享年若干以某月日  
權厝于縣西之五里原從宜也生子數人早歲夭落今  
之存者女子三人長者生纔六霜其次差以幼矣雖禮

所未及而號不絕聲呱呱然行路之爲惜戚公以爲鼓  
盆傷神兩不中節而鍾倩之哀可勝旣乎且虞陵谷之  
變乃命權氏甥德輿爲之銘曰

去夏屋之梁渠兮卽孤邱之峩峩兮往不可復兮沉痛  
如何薤露蒿里兮古有哀詩

唐睦州桐廬縣丞柳君故夫人天水權氏墓誌

銘 并序

夫人姓權氏天水略陽人十二代祖翼前秦僕射安邱  
敬公其後至周隋間有佐命功伐荷茅土者三葉以至  
曾王父滑州刺史匡城縣令崇本王父益州成都縣尉

無待烈考許州臨潁縣令伋成都以太學進士擢第臨  
潁判入甲科皆以文學著名粹行純氣有以鍾下夫人  
生而敏異姿性端明懿行全誠發於天授而和敬以事  
長慈惠以拊下窈窕德象動成儀度機鑿精辯而深自  
晦默伯仲甥侄等每有疑理滯義多所諮訪夫人不得  
已而後言言必中倫誠順之道自中形外外內族姻之  
中瞻其儀型剛戾者順不仁者化以貞元二年正月歸  
河東柳君君爲睦州桐廬丞方謂有魚軒象服之慶享  
偕者宜家之壽不幸遭疾痛以其年七月日終于桐廬  
之官舍享年若干自說悅至于屬纊九族無間言終食

無違德宜乎綏履福而介眉壽備祭服以叅蘭館而迨  
阨終身莫申其道六姻安仰爲善者惑豈善慶昭報之  
言妄作耶將壽夭淹速之度固有所定耶柳君奉其喪  
以某月日權厝于丹陽縣某原竇氏伯姊之塋次從道  
旨也從父兄子德與一二羣從銜茹永痛書實錄于墓  
石銘曰

采蘋采蘋列於詩人恭惟淑明與古爲隣嘉玉粹溫薺  
英蓋蕙凄風夜壑銷鑠堙淪命不可問兮從古法法追  
琢淑聲兮用識幽墳



新刊權載之文集卷第二十八

唐權德輿字載之

銘贊

唐故洪州開元寺石門道一禪師塔銘

并序

鐘陵之西曰海昏海昏南鄙有石門山禪宗大師馬氏塔廟之所在也門弟子以德輿嘗游大師之籓俾文言而揭之曰三如來身以大慈爲之本六波羅蜜以般若爲之鍵非上德宿殖者惡乎至哉大師法諱道一代居德陽生於異表幼無兒戲疑如山立湛若川渟舌廣長以覆準足文理而成字全德法器自天授之嘗以爲九



流六學不足經慮局然理世之具豈資出世之方唯度  
門正覺爲上智宅心之域耳初落髮於資中進具於巴  
西後聞衡岳有讓禪師者傳教於曹溪六祖直心超詣  
是謂頓門跋履造請一言元解始類顏子如愚以知十  
俄比靜居默然於不二又以法惟無住化亦隨方嘗禪  
誦於撫之西裡山又南至子度之龔公山攬搏者馴悍  
戾者仁瞻其儀相自用丕變刺史今河南尹裴公久於  
稟奉多所信嚮由此定惠發其明誠大歷中尙書路翼  
公之爲連帥也舟車旁午請居理所貞元二年成紀李  
公以侍極司憲臨長是邦勤護法之誠承最後之說大

抵去三以就一捨權以趨寔示不遷不染之性無差別  
次第之門嘗曰佛不遠人卽心而證法無所着觸境皆  
如豈在多岐以混學者故考父喫垢求之愈踈而金剛  
醍醐正在方寸於是解其結發其覆如利刃之破骨索  
甘露之洒稠林隨其義味快得善利者可勝道哉化緣  
旣周跌坐報盡時貞元四年二月庚辰春秋八十夏臘  
六十前此以石門清曠之境爲晏然終焉之地忽謂入  
室弟子曰吾至二月當還爾其識之及是委化如合符  
節當夾鍾發生之候叶拘尸薪火之期緇素幼艾失聲  
望路渡涸流而法雨滂灑及山門而天香紛靄交感之

陰昧者不知沙門惠海智藏鎬英志賢智通道悟懷暉  
惟寬智廣崇泰惠雲等體服其勞心通其教以爲吾師  
真性湛然與虛空俱唯是體魄化爲舍利則西方之故  
事傳焉不可已也乃率顛其徒從茶毗之法珠圓玉潔  
煜耀盈升建茲嚴事衆所瞻仰至七年而功用成竭誠  
信故緩也德輿往因稽首粗獲擊蒙雖飛鳥在空莫知  
近遠而法雲覆物已被清凉今茲銘表之事敢拒衆多  
之請銘曰

達摩心法南爲曹溪頓門巍巍振拔沉泥禪師宏之俾  
民不迷九江西部爲一都會亦旣戾止元津橫需慈哀

攝護爲大法礪五淨六觸駭然相蒙直心道場決之則  
通隨器受益各見其巧真性無方知道不竭顧茲夢幻  
示有生滅微言密用煥如昭晰過去諸佛有修多羅心  
能悟之有一剎那何以冥哀茲窳堵波

唐故寶應寺上座內道場臨壇大律師多寶塔

銘并序

京師東門二里所多寶塔者沙門靈湊等爲先大師薦  
祉盡敬之地也大師諱圓敬姓陳氏河南陸渾人報年  
六十四經夏四十四以貞元八年春正月馱代入滅於  
保壽寺越十有五日遷窆于龍首北原距茲塔西北十

餘步初大師入道依本縣思遠寺微公通法華經寶應  
二年制度編僧籍于東京長寺受具於白馬寺本律師  
曇無德義言下信解以爲遵道途而抵都邑涉門闕而  
躋堂皇故尸羅毗尼以攝妄想五部四分是爲扁鍵然  
後因定發惠最上乘優婆鞠多由是道也敷暢微妙攘  
除癡冥如一燈傳照一雨潤物宏我法者可勝道哉代  
宗朝徵入內道場累詔受興善安國寶應等寺綱首又  
充僧錄尋授寶壽寺上座賜律院以居授瑜珈灌頂密  
契之法講楞伽經起信論譯虛空藏經鑿義潤文世典  
羣書靡不該貫無非晏坐道場沃天心以了義照佛日

于中禁鬱爲龍象大拯斯人將滅之夕備申告誠中夜  
累足如期順化其智惠歟其解脫歟法子苾芻服纒成  
列仰護念慈哀之旨捨蓮花多寶之義厥後十五年而  
功用成丹素觚稜石輪火齊施于外聖像眞言多羅祇  
夜函于內又以見湊公成就付囑而爲上首况不出戶  
庭持經萬遍願力期滿嚴飾斯崇勒銘于茲以示塵劫

銘曰

三生不駐如電如瀑七情相攻如蠶如蝮彼上人者爲  
世導師乃精毗尼以攝羣疑宏道日大化緣斯畢建茲  
巖事如地湧出國門之東萬寓來同斯爲寶所燭耀無

窮

唐大興善寺故大宏教大辯正三藏和尚影堂

碣銘 并序

三藏者何于心爲戒定慧于學爲經律論惟西域二大  
士以正智法器爲天人師大宏教和尚本號金剛智南  
印度人出家於那蘭陀寺道成于迦毗羅衛國事龍智  
阿堵梨通惣持灌頂之法入師子國登楞伽山航海涉  
險聿來中上開元中隨鑾輅于兩都大智大慧皆握衣  
請益春秋七十三夏臘五十化滅于洛京起塔于龍門  
傳法於大辯正和尚和尙法號不空師子國人母氏方

振夢佛光照頂弱冠受具通三密法嘗賈國信往詣他  
方諷真言而海風恬息結秘印而狂象調伏若歲大旱  
實作霖雨內出方袍之錫猶命服焉至德初宣皇受命  
於靈朔譯不動尊經以獻凡所以順天心而導善氣者  
又何可勝言自開元末至大曆中三朝尊奉以密行救  
世代宗授以特進鴻臚卿賜號大廣智三藏旣以衆生  
病爲病于卧內加開府儀同三司封蕭國公大曆九年  
夏六月旣望示滅于興善寺追命司空不視朝三日尊  
名曰大辯正遣中謁者吊祠報年減先師三歲而休夏  
同數初武皇帝崇大師以次公命卿也先師有儀同之



贈宏教之益大師之弟子曰沙門舍光曇貞覺超惠齡  
於隣潛真惠覺等或爲肅宗灌頂阿堵梨清涼山功德  
使或爲內道場三教大德或爲僧錄皆偉然龍象爲法  
棟梁而惠應惠覺傳授秘藏永懷世道乃於仁祠法堂  
嚴事華飾儀同在西肅國在東睥容德宇瞻仰如在應  
公又推本其教曰昔毗盧遮那如來入不空王三昧說  
瑜珈最上乘義授于普賢以平等性智而造妙覺一印  
舍萬法五部周四方金剛之堅利蓮花之清靜悟入之  
速可思議哉普賢授龍猛龍猛授龍智凡千百載而先  
大師授于大師纂服大乘之教紹明三摩之法攝護成

就斯爲妙門大凡翻經七十七部一百卷命書愍冊表  
章答禮傳譯之差次弟子之號名環周素壁聳觀生敬  
淨名會中亦參世典宏明集內無匪佛乘初先大師之  
滅也呂工部向杜衛公鴻漸爲之記大師之云亡也嚴  
京兆郢沙門飛錫爲之碑感緣行化皆以詳熟今應公  
以二大師遺影之在此堂也不可以不識應公入大師  
之室德輿入應公之藩以茲因緣俾揭文字銘曰

法身徧照六葉傳妙惟二大師三朝演教天竺西極瑜  
珈度門連開法界月破重昏儼然象設復獲親觀如聞  
軟語如結秘印一室之中寂然感通道行無窮法子之

功

唐故東京安國寺契微和尚塔銘

并序

和尚俗姓權氏法諱契微天水畧陽人十代祖安邱敬公翼爲前秦僕射事備載記曾祖文誕皇銀青光祿大夫涪常二州刺史荊州都督府長史平涼郡開國公祖崇本皇朝散大夫滑州匡城縣令與兄戶部郎中崇基水部員外崇先皆以文學政事顯名于貞觀永徽之際考同光皇河南縣尉長安縣丞翰林詳定學士與伯兄益州成都縣尉無待仲兄欵桂梓三州刺史若訥三人同以大名舉進士擢第文章之美爲當時冠首然其世

德鍾慶若後無達者則有以清淨住世故和尚生而敏  
悟超然元覺九歲于薦福寺金剛三藏發心入舅茶羅  
道場傳持聖印悟入之速發於岐嶷然其德容具舉家  
族敬異將必擇卿士之良者以嬪之時勇于出世至欲  
及其膺以自免翰林府君既捐館母兄竟不能抑遂以  
初笄之年被服紫褐至天寶元年始受具於福先寺定  
賓律師隸東京安國寺師事苾芻尼無勝受心門方便  
之學以爲心寔境化真由妄遣遣之而真亦隨盡化之  
而心乃湛然故外示律義內修禪說因初心而住實智  
離有相而證空法乃通四部經於宏正大師尤精楞伽

之義而後住無住証洗六妄離二邊遵大道以坦蕩入  
法流而洄復以深惠善誘誨學徒或權或實爲歸爲  
趣亦猶淨名之隨機攝導蜀嚴以忠孝爲言故中外族  
姻徧沐其化漸漬饒益可勝道哉初以廣德中隨其家  
南渡安居于蘇州朱明寺以建中二年九月六日冥然  
化滅報年六十二經夏四十一弟子居惠操又其兄子  
也故探其義味最爲深入乃率額緇俗號捧金身建塔  
于東武邱寺之東北崗從其教也姪孫德輿以爲宣武  
有西方聖人之說東漢有浮圖仁祠之教以其教言之  
自菩薩提達摩七業至大照祖師皆以心法秘印迭相

授受故戒生定定生惠得第一義者冲而詣之嗚呼今  
其詣之矣桑門紀述多不分系緒今備書者亦無忘先  
德故其文也繁銘曰

教旨清淨戒珠圓映識浪情塵還源返性彼一切見皆  
妄想生精修密詣湛爾融明示現者何此身非久強爲  
之銘以焯于後

興唐觀新鐘銘

并序

聲爲陽所以發越金尙羽所以清澈故臆氏工焉法器  
成焉元門揭焉與夫樂出虛鏗立號同其功用而信響  
受祉之說倍焉興唐觀新鍾者觀主道門威儀太清供

奉郗尊師夔素之所創也是觀經構之初與舊鍾俱當  
開元甲戌距今七十有七歲頃缺毀弃法音不嗣久矣  
師有環中大辯爲道流龜龍循其妙然後無爲而無不  
爲所以恢元功宏願力誠修而物應言發而響會上士  
仁人展其助飛廉回祿理其具精乎六齊合以萬數以  
心齊以神遇橐地籟騰天光無害金無耗氣不窳不槲  
不右不播於是登簾在懸希聲殷然小大隨叩昏昕警  
衆周六虛而洞三界拔九幽而清五苦皇都人士游者  
萃者感於耳和於心躁者靜者懸解師之善利利物可  
勝道哉古者林鐘景鐘皆銘其功儒氏之典也推類以

鑣文字師之心也銘曰

其動也懸如天其用也虛而圓雷大音兮集羣仙福元  
后兮斯億年鏗匄響亮鴻都前上入冥兮下澈泉然後  
春容銷散兮返萬物於自然

世德銘

肅肅我祖元鳥自天天乙革夏武丁相賢手文命子開  
國于權肇荒南荆瓜瓞綿綿爰暨周襄征伐下顛凌暴  
紛紛遇楚而顛嬴吞四方我邦用遷乃宅隴坻乃封甘  
泉漢魏之際守相相繼或仁或哲亦夷亦惠圖謀葳蕤  
十有三世伊川其戎晉化爲東九州輻裂苻有關中明



明安邱濡跡匪躬二紀清夷明謨之功元魏以降苴茅  
繼封宜昌鄜城仍世儀同洸洸平涼策勲于隨乃破公  
祗尅其枚迴運偶聖時土田載開仗節建旌自東徂西  
父子六人承家鐘慶百里同休南宮並命自時厥後德  
輝愈盛不享大官世名文行我曾王父弱歲觀光聲軼  
大學名登奉常偉節三虎聯華並芳翰死春生士林風  
翔迨至王父保和居易人文獨步天爵自貴展禽下位  
賈生不試至今德聲尙聳清議郁郁世範先子承之大  
節明義人倫宗師行極忠孝道冥希夷卷舒無方焯燿  
當時曰予無狀亂歲而孤不知義方藐爾春愚亦旣羈

貫甫習詩書以直爲師與時濳跡瓊瑤清風曠曠士則  
及茲頑童是玷是辱聿修之戒大懼不克夙夜以思敢  
銘世德

幾銘

大和熙熙酌而用之旁魄變化皆生乎幾上合乾道萬  
物陰陽下爲人紀百工咸秩游泳虛無含體渾區乃卷  
乃舒與羣有俱冲用爲工方寸爲鑑周行不殆造物可  
伴一人制動寡以理衆或行其道或藏其用盤桓利貞  
得其大行爨贊裁成粲然文明舒百八極藏之無形山  
川出雲元氣冥冥故曰知幾其神孔父用文去聖遠矣

時無其人見幾而作造形斯悟遠生可卷顏子殆庶物  
至知之節宜好惡無愆五事無汨百度靜之如淵運之  
如環得喪糾纏相望其間不見朕莫知其然審而用之  
吾道常全

歲星居心贊

并序

興元紀號春三月司天氏奏歲星居心宿五度其色黃  
明潤大光澤帝位積五十餘日詔下有司臣謹按歲星  
五帝爲蒼五行爲木五常爲仁五事爲貌天意若曰時  
以至仁爲理覆露萬人浹洽生類則發于心緯形于古  
應陰陽大化昭報成功元符幽贊其昭昭如是禮運之

論聖人以日星爲紀以四時爲柄洪範之叙皇極曰欽  
時五福用敷錫厥庶人發于人格于天天人交感合若  
符節微臣伏于草茅之下沐浴仁聖敢獻歲星居心贊  
一章以備周詩由庚由儀之關贊曰

皇矣上帝降鑒下人后王承之制作禮文又用清明家  
尙孝仁人無癘疵俗以阜蕃敷佑四方發爲天祥重華  
煌煌乃居明堂下煦仁澤上爲祥光回復感通天人攸  
同乃法五事乃建大中君君臣德輝昭融保佑命之  
自天無窮微臣作歌敢備唐風

二 踈贊

靜專動直惟乾之德酌用不窮君子中庸矯矯二疎知  
微知終功成不居父子清風天子賜金羣公出祖都門  
之美焯映千古優游衡門棲息化源日飲醇耐心閑道  
尊人或言利和令智昏清行素風可貽子孫萬物營營  
吉凶相生環中之樞泊然遺形中林寂寥幽蘭自榮雖  
有矰繳不羈冥冥知止不殆古先炯戒賢哉大夫終始  
無悔

秘閣五絕圖賀監草書贊

季真造適揮翰晚壁酒仙逸態草聖絕跡興涵雲海詞  
韻金石傳于秘邱永永無斁

無爲先生贊

至人無感與化升降全而不形保而不蕩泯然順物付  
之自當苟乖于是無非溺喪保合浩淳先生其人德機  
不發鳥獸同羣稽首元關清滌蒙昏笑而謂子道不遠  
身支離而全以靜爲君滑之則散泊之則存天性者名  
木伐蘭薰與時卷舒中若浮雲挈鼻絲棼無撓而真勤  
而用斯至妙之門百昌皆化吾亦歸根動作天紀靜爲  
地文鳥行無章變化云云強名無爲以鏡心源

畫西方變贊

惟西方有極樂國以首楞嚴爲理其應溥其用神大抵

攝萬緣羣動會於虛寂其次則感通信誓爲釐爲福局於世論者多置爲他方之教惟孝子信士仰爲冥助則像設之綵繪之用申罔極之報今茲西方變卽故戶部員外郎贈給事中范公之孤曰傅正傅質奉爲先妣博陵崔夫人旣練所畫也惟夫人以淑明柔順光配戶部自畫哭之後訓二孤之暇每讀誦大乘微言密詣精理今傅正等又能將順先旨發于孝思於精廬素壁合朱綠金翠之飾天人法相靡不嚴靜以夫人之福履孝子之至誠若乘念以游如經之旨當趺坐于英渠上品之中生滅流妄於是昭息予嘗心奉其教故得贊其所以

然

畫釋迦如來贊

釋迦大聖以無礙應身演一切法後之人跡文字以爲象設誠明在中而福祉隨之伯舅武進縣丞府君守儒門言行之訓安貞下位其道未光貞元三年捐館舍太夫人從子于鍾陵承訃發哀茹終鮮之痛且痛不得當哭泣之位躬卽遠之事葺喪之禮有加等又曰悲哀鍾于情而不足以爲冥助也乃稽諸釋氏說以爲幽贊交感之際不相遠也是徵景福以作繪事煥以金碧穆然尊嚴瞻仰之際如在佛刹况孝悌通乎神明聖功演乎

權載之文集

卷三

三

無方小子德輿謹繫以贊



五色相宣兮聖質昭明福祥下炤兮保佑冥冥

繡阿彌陀佛贊

十二因緣之中生死循環憂悲蘊聚夫非大聖以利又  
斷之慈航濟之則淪胥顛沒之不給矣惟阿彌陀佛化  
行西方其號極樂有生之乘念感化則游於斯今茲功  
德者清信士女隴西李氏爲亡夫襄陵尉榮陽鄭君再  
期之爲也女士歸鄭周一星而孀凡事舅姑以孝從娣  
姒以敬佐夫以義拊下以仁隱約終窶至于晝哭衛風  
碩人栢舟之詩實兼痛焉初鄭君旅人于晉因以筮仕

成命甫行祿未及而大病女士方侍姑于吳承訃加痛  
宏誓徵福薦于冥冥紉針綴縷叶用五采青蓮白毫髮  
鬚頰伸彼二大士列侍左右眸容交光炳耀煌煌發于  
心成于手阿鞞跋致其遠乎哉鄭固善士妻又吾伯舅  
之女子子也得周知之因以贊曰

西方大聖乘念則至寫彼相好導茲智氣冥助無方以  
成鄭志

新刊權載之文集卷第二十八終